



## † THEOFANI

**Nga Mëshira e Perëndisë  
Peshkop i Filomilisë  
dhe i Peshkopatës Ortodokse Shqiptare të Amerikave**

### LETËR BARITORE LINDJA E KRISHTIT 2023

**Klerikëve të nderuar dhe besimtarëve të krishterë ortodoksë, bij dhe bija anëtarë,  
mbështetës, dashamirës dhe miq të Peshkopatës Ortodokse Shqiptare të Amerikave**

*Hir, Mëshirë, Paqe dhe Gëzim nga Zoti ynë Jesu Krisht dhe nga ne, bekime atërore!*

*"Unë po ju lajmëroj një gëzim të madh për të gjithë popullin; sepse sot në  
qytetin e Davidit lindi për ju një Shpëtimtar, që është Krishti, Zoti".  
(Luka 2:10-11)*

Festa që po vjen para nesh përfaqëson përmbushjen e besëlidhjes midis Perëndisë dhe njerëzve. Foshnja Jesu, lindur në një grazhd në Betlehem, ndriçon jetën e secilit prej nesh dhe të gjithë botës, sepse edhe vitet janë shenjtëruar duke i numëruar nga Lindja e Zotit tonë Jesu Krisht. E gjithë krijesa mrekullohet me misterin e zbritjes së Perëndisë tek ne dhe dridhet nga përlësia e treguar nga Biri i Perëndisë, Ai që u lind në trup nga Nëna e Perëndisë dhe Gjithmonë Virgjëresha Mari.

Lindja e Krishtit Shpëtimtar, të cilën e gjithë krijesa gëzon, na bën të reflektojmë më thellë mbi misterin e Mishërimit, sepse mënyra e bashkimit të dy natyrave, Hyjnore dhe Njerëzore, në Personin e vetëm të Birit të Perëndisë, është modeli i unitetit të Kishës. Duke qenë një kungim teandrik, Kisha është Trupi mistik i Krishtit, në të cilin uniteti i besimtarëve imiton unitetin e Trinisë së Shenjtë. "Tubimi në Kishë është mbi të gjitha Misteri i dashurisë. Ne shkojmë në kishë për dashuri, për dashurinë e re të Vetë Krishtit, që na është dhënë në unitetin tonë". (At Alexander Schmemmann)

Nëpërmjet Mishërimit të Tij, Krishti Zot mori "zgjedhën e njerëzimit", duke marrë në veten e Tij trupin universal të Kishës; "Ai nuk mori trupin e qiellit, por trupin e Kishës. Qielli është për Kishën dhe jo Kisha për qiellin". Kreu i Kishës është Krishti Zot, i Cili u bë Njeri! Ai qëndron në lidhje të përjetshme





me njerëzimin dhe banon nëpërmjet Shpirtit në zemrat tona, "që, duke e pasur Atë në ne, të thërrasim me zë të lartë: "Avva! (At!)", ne të mund të arrijmë lehtësisht në gjithë virtytin dhe, veç kësaj, të qëndrojmë të fortë dhe të pamposhtur përballë dredhivë të djallit dhe kundërshtimeve". (Shën Kirili i Aleksandrisë, Komente mbi Ungjillin e Shën Joanit, X, II, f. 983).

*Shumë të dashur në Krishtin Jesu,*

Uniteti shpirtëror i Kishës, i dhënë nga Krishti Zot në Frymën e Shenjtë, merr një përgjegjësi të madhe nga ne. Deklarata e njohur e Shën Qiprianit të Kartagjenës që thoshte: "**Extra Ecclesiam nulla Salus!**" (**Jashtë Kishës nuk ka Shpëtim!**), shpreh vërtetë mesimin e Shpëtimtarit Jesu Krisht; se jashtë bashkimit të dashurisë, bazuar në besimin e drejtë, nuk ka Shpëtim. Çdo person, si anëtar i Kishës, jo vetëm që duhet të kujdeset për veten e tij, duke u ruajtur nga mëkati si dobësim i Unitetit Kishtar, por ai duhet të kujdeset për të afërmin e tij me përgjegjësi dhe dashuri sakrifice, siç na mëson Apostulli i Shenjtë Pavli: "Ecni denjësisht, sipas thirrjes me të cilën jeni thirrur, me gjithë përulësinë dhe butësinë, me durim të gjatë, duke falur njëri-tjetrin me dashuri, duke u detyruar të ruani unitetin e Shpirtit, në lidhjen e paqes. Është një Trup dhe një Shpirt i vetëm, ashtu siç u thirrët për një shpresë të vetme të thirrjes suaj; është një Zot, një besim, një pagëzim, një Perëndi dhe At i të gjithëve, i Cili është mbi të gjitha, përmes të gjithave dhe në të gjitha. Dhe secilit prej nesh na u dha Hiri sipas masës së dhuratës së Krishtit". (Efesianëve 4:2-7).

Uniteti i Kishës duhet të jetë një model për unitetin shoqëror. Ashtu si dashuria hyjnore e shfaqur në personin e Shpëtimtarit Jesu Krisht është në themel të Kishës, ashtu edhe dashuria ndaj të afërmit është në themel të unitetit të Kombit, fakt për të cilin ne ndërmjetësojmë në Liturgjinë Hyjnore: "Duke lypur bashkimin e Besës dhe pjesëmarrjen e Shpirtit të Shenjtë, veten tonë dhe njëri-tjetrin, dhe gjithë jetën tonë, Krishtit, Perëndisë, le t'ja parashtrojmë". (Liturgjia Hyjnore e Shën Joan Gojartit)

Festa e Lindjes së Zotit, e Vitit të Ri dhe e Pagëzimit të Zotit (*Theofanisë*), t'ju sjellë shumë paqe, shëndet, gëzim të bollshëm dhe forcë në shpirtrat tuaj!

**Krishti u Lind, Lavdërojeni! Krishti është në tokë, lartësojeni!**

*I juaji me lutje në Zotin dhe Perëndinë e porsalindur Jesu Krisht, Shpëtimtarin tonë,*

  
+ THEOFANI

i Filomilisë dhe Dhioqezës Ortodokse Shqiptare të Amerikave

